


16 MEI 1977

1977
BULEVARD

BOULEVARD

AÑA 1 — NO. 8 — MEI 1977



Checkpoint color

PROLOGO

Un fecha sigur cu un y tur a celebra, tawata 1 Mei dia di obrero. Na momento cu boso tin boso revista Boulevard den boso man, ya e fecha 1 Mei ta pertenece na pasado.


Sinembargo bo revista no kier keda atras, y danki cu cooperacion di Sr. Bruno Arends y Srta. Carla Wix (Miss Teenage Aruba 1976) cu ta tin e bondad di a posa pa nos kaft, nos por dedica e kaft aqui na tur obrero di Aruba, y alavez nos kier manda un palabra di felicitacion na tur nos obregonan.

Bo Autor: T. Lopez

OKIBAIMA

COFFEESHOP

SEMPER NA TOP!..



TEL. 4439

Revista mensual "BOULEVARD"

Redactor: THEOLINDO LOPEZ

Carta por ser dirigi pa

"BOULEVARD"

Sta. Cruz 162 - ARUBA

Tel: 8254

Tur articulo ta reserva, i bouw di ningun medio por ser copia of usa bouw di ningun instancia sin permiso di su redactor.

Cada autor ta responsable pa su articulo.

Imprenta: INTERPRINT

"BOULEVARD"

I SU NUMERONAN DI SUERTE



17

32

01

14

76

97

J.E.P. CABENDA



BO CAS PA TUR ARTICULONAN DI DEPORTE

Y

TAMBE PA PLASTICO PA FURA AUTO Y MUEBLES

Oranjestad

Tel: 1539



PJA - 10

VOZ DI ARUBA

EL GAUCHO

Papiando di Bar - Restaurant, El Cauchó, ta un experiencia yen di sorpresa. Mientras cu nos ta combersando cu e supervise y ademas e waiter di El Cauchó, Sr. Rochi Geerman, den e waitingroom, nos a laga nos bista cai mas den e sala, caminda e mesanan ta wordo ocupa pa clientenan cu ta saboreando di nan cuminda. Pa un momento un di e clientenan ta waak patras, y ta mirando den mi direccion, pa despues bolbe kita su cara, pasa man cu un glas di cerves, pa despues pone na su boca, pa asina facilita e cuminda mas mihor. Na e cliente su cara bo por lesa cu e cuminda cu e ta saboreando ta di un sabor super.

Restaurant, El Cauchó ta situa den Wilhelminastraat 80, na unda for di un casita di mas o menos un 100 año bieuw, a wordo moderniza den un restaurant tipicamente Argentino, na cual hunto cu e decoracion di e restaurant cual tambe ta tipicamente Argentino, hunto cu su lus nan dornando e muraya ta forma e berdadera ambiente cu ta na Argentina mes bo ta sinta den un restaurant. Algo unico ta cu tur cuminda (carni) ta wordo gegrill, y e smaak hunto cu e holor di e carbon ta forma un smaak delicioso y unico.

Sin duda sigur lo bo sinti bo tranquil y leeuw for di tur problema of preocupacion na e momento cu bo laga bo mes sak den un di e stoel nan di cuero, bouw di e lus nan tan romantica cu ta brilla e claridad cu bo mester, ni di mas, ni di menos.

Mientras cu bo ta sperando ariba e cuminda, lo bo por pidi un cerves bon frieuw, of un refresco, of un bon biña for di e coleccion di 26 clase di biña di e mihor marcanan di mundo. Of, kiko bo ta pensa di un bon sangria di cas mes, cu ta wordo prepara pa Rochi Geerman mes!

Mientras cu lo bo tuma un slok di cerves, lagando talvez algun scuma di e cerves ainda na bo boca, lo bo por laga bo bistanan admira e decoracion asina preciosa cu ta forma un adorno unico pa mira, y si na e momento ey lo bo kier sabi ta di ken tur e obranan ey ta bini, anto bo no mester bai cu bo pensamiento mucho leeuw, e obranan aqui, ta di e propietario mes, Sr. Angel Botta, kende den su ora liber a dedica su mes na esey.

Lo bo sinti bo berdaderamente cu bo ta den un restaurant, algo otro cu tur e otro restaurant nan, na e momento cu bo mester wordo sirbi na bo mesa, cu algo special, porehemplo un pincho.

Esaqui ta wordo sirbi na un spada, cu su saladanan y cu 4 diferente di carninan, caminda cada carni ta keda cu su mes un smaak. Jegando na bo mesa cu e pincho na e spada, e ta wordo sirbi den bo tayo.


Figura bo, cuatro diferente carni, bisa mi, cu esaqui no ta algo special. Un di e secreto mas grandi di e Restaurant, El Cauchó, sin duda lo ta e chimichurri cual ta un sorto di saus, cu ta consisti di 18 verdura sin picante.

Di esaqui e orgulloso propietario di e restaurant, El Cauchó, Angel Botta ta bisa nos lo siguiente: "Caminda mi a cumenza siña camna, tawata den e restaurant di mi tata na Argentina, y for di mi tata mi a bin na logra na haña e secreto di e saus ey, cual awe ta un di e exitonan tambe for di nos cushina." Sr. Angel Botta ta contando cu un orgullo den su voz.

Ariba un pregunta di nos na A. Botta, cu ta cual cuminda segun su persona ta e mas gusta, of e mas pidi pa e bishitantenan di El Cauchó, e ta dirigi su bista na su compañero Rochi Geerman, manera un cu ta busca un contesta mas sigur, pa despues contesta:

"Awel e mas pidi, y e mas gusta mi ta kere cu sin duda ta scampi, e ta un plato internacional."

"Pero mi no sabi, Sr. Rochi Geerman ta cai tambe den e combersacion, pero ki ora cu mi jega cu e pincho na e spada, e clientenan ta saborea esey completo, hasta e siboyo nan ta come ful, asina ta ami ta kere, cu e cuminda sirbi na e spada lo ta algo di nos top tambe." Sr. R. Geerman ta bisando nos, mientras cu Sr. Botta ta knik su cabes cu esey ta berdad.



Sr. Angel Botta propietario y alavez cosinero di restaurant El Cauchó.



Les semper Revista Boulevard

Gracioso tawata e contesta cu nos a ricibi na e pregunta aqui: "Cual ta e cocktail di e cas?" Mientras cu Sr. R. Geerman a cuminsa hari, Sr. Botta cu un hari ta contesta nos: "Esey ta, pelea de gallo." Angel Botta ta contestando cu un hari, mientras cu R. Geerman kende ta sinta un banda hariendo ta kita su cara. Pero cu e number ey mi no a keda satisfecho ainda, i mi a dicidi di puntra, ta com nan a bin na e number di, pelea de gallo. Sr. Botta hariendo cu tur su curpa ta contesta: "Esey a bini, door cu ki ora cu e hendenan tume, nan ta cuminsa na descuti cu otro." Botta hariendo a contesta nos.

Cu e Bar Restaurant, El Caucho, tin bon number te pafor di Aruba, Angel Botta a bin na realiza esey, door di e turistanan venezolano cu ta bin pa bishita nos isla, ta bin directamente pa ey nan, cu e direccion cu nan a ricibi for di otro conocirnan na Venezuela.

Restaurant, El Caucho, su propietario no ta un desconocido aqui na Aruba, su propietario ta e futbolista profesional di fama internacional. I mi no ta ke- re cu na Aruba lo tin algun hende cu no a tende nunca di Angel Botta.

Angel Botta a jega Aruba na 1952, contrata pa Aruba Jr. Ainda ta fresco den nos memoria e campeonato juveniles di reinado na 1969, cu a tuma lugar na Hulanda, unda cu un equipo di Antilla tambe a participa, y a logra gana Hulanda. Es aqui den historia di futbol, tawata prome biaha cu un equipo di Antilla a gana hulanda, anto na Hulanda mes. I mi no kier keda sin menciona tambe cu Rochi Geerman kende awor ta emplea na El Caucho, tambe a participa como delantero di e equipo antillano na hulanda, cual team a wordo compaña pa Angel Botta.

Ariba nos pregunta ta kiko a trece cu Angel Botta a bin cu e idea pa lanta un restaurant. Angel Botta a duna como contesta lo siguiente: "Mi profesion ta futbolista, peromi no por keda core semper tras di

un bala, mi mester a cuminsa pensa pa futuro, na cual mi a dicidi di cuminsa cu e restaurant aqui." A. Botta ta splicando nos. Pa un momento e la stop di papia, pa despues sigui cu su combersacion: "Ami tin gana di laga futbol, pero no ta parce cu e sport ey kier laga mi, A. Botta ta splicando na nos, pasobra te ainda mi tin cu sigui train, core, etc. etc. pasobra ki ora cu mi keda un dia sin core, mi musculonan pa su mayan ta haci dolor.

Restaurant El Caucho, sigur lo ta un bon lugar pa cualquier celebramento di cumpleaños, recepcion, pa combersacion nan di negocio etc. etc. etc. Mi no kier keda sin menciona cu tur weekend bo por come bouw melodianan di e musico arubano, Tony Thijsen.

Tambe El Caucho, tin un lugar priva, pa 16 te pa 20 persona tipicamente Argentineru. El Caucho, un bar restaurant cu bo mester drenta, cu hamber of sin hamber.



Sr. Tony Thysen kende cu su canto deleitando e clientenan. Ariba e mes un potret aqui, nos por mira Sr. Rochi Geerman supervise y waiter di restaurant El Gaucho.

Un testamento di bida di un mama cu mester muri

Lucy Fray di 34 aña hunto cu su esposo ta bibando na Ottumwa (U.S.A.). E pareha tin 10 yiu entre 5 luna y 13 aña. E señora lo muri dentro di un aña, pa motibo cu e ta sufri di cancer, y ningun docter no por yudele.

Su esposo ta sufri di arhritis, y una vez cu su esposa mester bandona e mundo, e no ta un persona cu lo por keda mira pa su 10 yiunan.

“Mi no kier pa mi yiunan bai ningun clasa di weeshuis of qualche lugar, dia cu mi no tey mas.” Lucy Fray ta bisando su esposo. “No ta importa mi, si e hendenan cu lo bai tuma mi yiunan lo ta pober of rico, tur loque mi ta desea, cu nan ta hende cu comprendemento, y cu sabi kiko e palabra amor ta nifica, y cu nan lo sabi com pa stima mi yiunan mescos cu ta nan yiunan nan ta.” Familia Frays ta bibando den un casita chiquito. Hunto nan tawata bibando feliz, aunque cu financieel nunca nan no tawata di e bon ey. Te cu ariba un dia cu Lucy a bin na realiza cu algo no ta bon cu ne, y cu e la dicidi di bai un dokter pa un saminacion. E dokter aqui a mande pa un especialista: Lucy tin cancer, y e ta sinti su mes tur perdi. “Dokter. . . mi kier pa bo ser berdad den bo palabranan, pa asina mi por haña sabi com leeuw mi ta para.” E la bisa dr. Pedersen. “Dokter, mi kier sabi exactamente cuanto dia mi tin pa biba ainda, pa asina mi por regla algun cos nan necesario, prome cu mi bandona e mundo aqui.

E NO TA TIN MIEDO.

“Mi no tin miedo pa muri, Lucy cu un voz calma ta sigui bisando. “E pensamiento pa muri, no ta hinca mi den un spanto, pero mi tin 10 yiu, y mi ta haña cu ta tristo, si nan mester bai den un weeshuis. Mi lo kier busca hendenan pa nan, cu sabi pa stimanan y mira pa nan manera ta nan mes yiu nan ta. Mi pensamiento awor aki ta ariba mi yiu chiquito di 5 luna, Stephen. Tambe mi ta pensando ariba Frank. Ta awor e tin 6 aña, y e pober ta sufri di epilepsia. Lo tin un hende den e mundo aki, cu lo bai tume como un yiu?”

Despues cu e yiu muher mayor di diestres aña, Joanne, y Pauline di diesdos aña, e anochi ey a caba di haci cuminda, Lucy a yama tur su yiunan y tambe su casa huntu, y cu tur su calma e la contanan cu huntu e tin un aña mas o menos pa biba ainda, y kiko su pensamiento ta pa un y tur.



Lucy Fray lo tin cu muri pronto, e tin un deseo, esey ta cu su yiunan lo por encontra bon familia cu lo por ser bon mayornan pa su yiunan, pa mayan si e no tey mas.

“Unda cu ta, asina e ta bisando, mester tin hende bon ta bibando, cu talvez kier turna boso den nan hogar. I un di mi deseonan grandi tambe cu mi tin, ta pa boso nan keda cu bon contacto cu otro Lo mi resa na Dios, cu e por juda nos cu sorto di bon hende pa mira pa boso, prome cu mi muri.

PUBLICIDAD SIN FIN.

Lucy a combersa tambe cu e pastoor Samuel Pike, y di un of otro manera un courant a bin haña sabi e problema di familia Fray. Di tur manera henter e storia di Lucy a sali den courant. Despues e storia ey a sali den tur e courantnan. I no a pasa ni dos dia, cu un cantidad di telegram y cartanan a cumenza drenta pa familia Fray, mientras tanto cu den tempo di tres siman, mas cu cincomil persona a bishita e casita pa asina mira e muchanan. Un persona cu tambe hunto cu su señora a lesa e storia ey, ta Norman Chapman, un director di banco.

I pa motibo cu e pareha aqui no por bin na haña yiu, y cu nan tin e deseo di adopta un di e yiu hombernan of un di e mucha muhernan, nan a dicidi di acerca e mama cu mester muri pronto. Aqui nan Norman Chapman e director di banco mes lo ta na palabra:

Lucy, kende su number ta skirbi hasta ariba su ca-

ra, bo por bisa, cu e tin cu muri, ta lansa tur sorto di pregunta na esnan cu ta desea un di su yiunan. E ta lansa bo asina hopi pregunta, cu ta parce cu ta mescos cu ta dilanti un polis bo ta, pa nan verhoor bo:

Bo sa bebe? Bo sa bai misa? Bo a jega di encontra bo cu problema dilanti di polis? Bo tin qualquier papel cu por prueba bo karakter? Pakiko bo ta desea un yiu? Bo ta desea un di mi yiunan, pasobra bo tin duele di mi, of duele di e muchanan - of bo ta desea un di mi yiunan pasobra bo kier e manera ta bo mes yiu e ta, y di e manera ey e lo haña tur bó atencion, manera ta su mes tata bo ta?

PERMISO PA DOS DIA.

Algun di su yiunan a haña su permiso pa bai cu un hende cu kier tuma nan, pa dos siman. Despues e mucha mester bin cas atrobe, na unda e ta lansa e mucha tur sorto di pregunta, tocante e familia cu e la keda serca dje. Despues e la cuminza entrevista e mayornan, cu kier adopta un di su yiunan, y despues e la papia cu nan, caminda e muchanan tambe ta presente, pa asina tuma parti tambe na e combersacion. I si e mira cu tur cos ta bon, e yiu cu nan kier, mag di bai, pero ningun di su yiunan mag bisa e palabra, ayo.

E la logra di encontra bon familia pa su yiunan, dr. Norman Chapman ta sigui conta, y despues cu ami hunto cu mi señora a bai bek serca dje, nos a ricibi su permiso pa bai cu su yiu chiquito cual ta jama Warren, kende a caba di cumpli tres año.

E ULTIMO SIMAN

Lucy Fray, no tawata sabi, cu e diadomingo merdia cu nos tawata na su cas, pa busca Warren cual mucha ~~no~~ mag di haña, cu tawata su ultimo siman cu e lo ta na bida.

E cas e diadomingo ey, tawata bashi, bashi sin e muchanan, e gritamento custumbra di e muchanan no ta resona mas door di e cas. E cas ta bashi mes, tur e muchanan a bandona e cas caba, solamente Frank di seis año, e mucha cu ta sufri di epilepsia ta hungando su so den un huki. No ta parce cu lo tin un hende cu lo kier tume como yiu. Talvez pasobra e ta malo.

Lucy Fray a bisa nos lo siguiente: "Mi no sabi cuanto tempo mi tin pa biba ainda, pero mi ta sinti mi feliz pasobra mi yiunan a bin logra encontra bon familia pa mira pa nan. Solamente mi yiu Frank di seis año, so a keda ainda den cas, pero mi no por conta e hendenan mentira cu e ta perfecto di salud, pa despues resulta cu Frank ta un estorbo grandi pa nan pa motibo di su malesa.

Nos a tuma despedida, y nos a bai pa cas bek. Pero diripiente ta manera mi no tin smaak mas den nada, tur mi gana di come a kita, y cu mi señora esey tambe ta pasando mescos. E tawata dunando Warren su cumindaden e sala caminda nos ta sinta ey



Frank e mucha cu ta sufri di eplipsie, no ta parce cu ningun nende kier tume como yiu. Pero toch despues e tambe a logra na encontra un familia cu kier adopta e como un yiu, hunto cu su ruman Warren. Ariba e potret aki nos por mire, un poco dia despues cu su mama a fallece.



Ariba e foto aki nos por mira cuatro di e yiunan di familia Fray. Na robes e yiu mayor Joannie; esun cu ta cargando e mucha chiquito ta Pauline. Canto di dje para, un otro yiu di familia Fray.

den, pero ningun di nos dos ta bisando otro un palabra. Asina a pasa basta rato, te cu mi señora a cuminsa papia cu mi:

“Norman, ta kiko a pasa bo, cu bo ta asina keto awe? Sigur bo ta pensando ariba Frank, no ta asina? Lo bo kier adopte tambe como yiu, Norman? e ta puntrando, y ora cu mi a knik cu mi cabez si, mi señora a sigui bisa: “Mi tambe lo kier Frank como yiu, pero mi ta tin miedo di laga bo sabi esey. Mi ta dispuesto pa tuma tur e risiconan, y lo mi stime mescos cu mi ta stima Warren, y lo e ricibi tur e amor cu un mama por brinda un yiu serca mi.”

E TAWATA SABI ESEY.

Nos a puntra un señora, kende ta un bisiña di nos, cu e lo por tin e bondad pa tene Warren serca dje tan tem, pasobra nos tin cu bai bek trobe na e cas di familia Fray. Na e momento cu nos a jega ey nan Lucy a habri e porta pa nos, mi a mira algo cu pa henter mi bida lo mi no lubida mas: Frank ta sinta bon bisti ariba e sofa, y canto di dje e tin un maleta cu tur su pañanan aden. Cu un voz masha



Dos mucha muher chiquito, yiunan di familia Fray.

calma Lucy ta bisando: “Mi sabi cu boso lo bin bek pa busca Frank. Pesey mi a prepare pa e warda boso.”

“Com bo por sabi esey, señora Fray?” mi señora sorpresa di loque e la tende, ta puntre. “Mi por a ripara esey na boso wowo, na e momento cu boso ta mirando na Warren y Frank, kende nan tawata hungando pafor e momento ey. Mi ta sabi cu boso lo mester bin bek.

Lucy a duna su yiu Frank un sunchi como despedida, y nos a bai despues cu Frank. Pa su mayan mainta nos por a mira com contento nan dos ta hungando cu otro dilanti cas.

Hopi laat e anochi ey nos a ricibi un jamada na telefoon di e pastoor Samuel Pike:

E la caba di bini for di cas di familia Fray. Lucy a fallece. Contento e la sera su wowonan, pa despues no habrié mas. Lucy ta sosega na pas.

Despues cu tur su 10 yiunan a encontra un hogar, e la bin na acepta cu morto por a bati na su porta. Aunque, segun docternan cu e morto a bin mucho tempran pe ainda.




Tres yiu di familia Fray, hariendo di contento.

GALERIA MODERNA

TAMBE PA AÑA 1977

E TA BO

PALACIO DI MUSICA.



Longplays
45 RPM
Cassettes
Tapes
Radios
Posters
Novelties
Cartridges

Hendrikstraat 15
Oranjestad

Tel. 4080
Aruba.



Pagina Charmant



Escritora: Vivian Wever - Lopez

NOS MUHERNAN CASA.

Hopi biaha bo ta ripara un mucha muher cu un cara bunita y cu un figura esplendido, cu tur caminda cu e camna no solamente hombernan ta keda mire jen di gana, sino muhernan tambe ta keda mire jen di envidia.

Mayoria di vez esnan bunita no ta casa, y esnan cu ta mira jen di envidia si ta casa. Pakiko ta asina??? Casi sigur esnan a lubida cu tempo cu nan tawata soltera nan tambe ta tin e curpa bunita ey, cu sin duda algun vez pa via di nan mes descuido a laga e figura ey bai perdi. Y awor bo mester mira nan. Mayoria di nan tin asina un barica y pa colmo sin make-up. Hopi di nos hende muhernan ta kere cu una vez cu nan ta casa, nan no mester cuida nan curpa (figura) mas.

Nan ta tuma nan retiro for di trabouw, pasobra nan esposo mes ta gana suficiente placa pa crianan. Y kiko nan ta haci awor na cas? Drumi, lanta haci cas limpi, come y camna henter dia den yapon, te den oranan laat cu nan tuma un baño, y dios sa, si nan ta corda di peña nan cabei.

Esaki no solamente ta pasa na Aruba, pero mi ta kere tur rond di nos planeta.

Si mi por duna bo un conseho? bo ta puntrando talvez. Cu mil amor lo mi hacié.

1. Bo a casa? No lubida con bo esposo a gusta bo, prome cu boso a casa. No pensa nunca cu e la custumbra caba cu bo. Corda cu custumber no tur ora ta bon.
2. Si bo ta trahando, no pensa solamente cu e placa (salario) di bo casa ta suficiente pa mantene abo (y familia) pa asina bo kita for di trabouw, pasobra trahamento for di cas ta tene bo semper den contacto cu e mundo pafor di cas, y esey ta obliga bo pa tur dia bo mester lanta dress-up pa bo bai bo trabouw, y asina tur dia bo ta luci bunita.

Awor si bo tin yiu, y bo mes como mama kier educa nan, pa mayan nan lanta un bon mucha, anto esey lo mi considere como un deber, pero e ora toch lo mi kier conseha bo pa busca algun actividad for di cas, y di es manera ey toch lo bo tin contacto cu e mundo pafor di cas.

3. No usa nunca e palabranan "Ay, mi ta bieuw caba". Corda semper, cu esun cu ta pensa cu e ta bieuw, ta haci su mes bieuw.
4. No bin cu excuus cu bo a haña yiu, y bo a keda gordo cu barica grandi. Pasobra pa esey no tin despena, tin un cantidad di ejercicios pa baha

barica, y pa e gordura, come menos. (Cu un tiki esfuerso bo ta logra hopi.)

Si bo tene e puntonan ariba menciona na consideracion lo mi ta sigur cu lo bo no tin mester di envidia ningun hende pa su figura. Especialmente e punto number 1 ta algo cu ta pasa hopi den nos comunidad.


PAKIKO?????

Por ta cu mayoria di nos hende muhernan ta carga e pensamiento, cu pasobra nan ta casa ningun hende no ta gusta nan mas? of pasobra cu nan no ta wak ningun otro muher mas???

Malo, malo, malo. Si ta asina bo ta pensa anto bo ta completamente equivoca, pasobra abo lo bira mahos, y bo esposo cu bo ta stima, su smaak lo keda semper, y ki ora cu tin un muher bunita lo e wak e. Pesey lo ta mucho mas mihor si abo dedica un poco mas di bo tempo na bo figura. Percura pa nunca, bo no tin mester di envidia ningun hende. Laga nan envidia bo.



**SI BO TA TRAHA, RENOA OF
DRECHA CUALQUIER EDIFICIO:
MIRA PROME NA E FIRMA CU
TIN E SURTIDO DI MAS GRANDI:**



**BOUWMAATSCHAPPIJ
ARUBA N.V.**

**Druivenstraat 10 - Dakota
Tel. 1275**

E sustu di tur hende muher den nan kamber

Tur esaqi nan a cuminza algun año pasa, ora cu den un caya na rand di Paris, muherman den anochi ta worde abusa sexualmente den nan kamber for di nan gusto. Tambe hortamento ta tumando lugar, sin cu e polisnan por a bini atras ta kende ta e persona cu ta e culpable tras di esaqi, pa asina detene. Mientras tanto kehonan ta cuminza drenta na tur e warda di polisnan. E mas tanto kehonan cu ta drenta aden, ta bini di hende muherman, cu semper ta conta tocante un joven misterioso cu a sabi di penetra den nan dormitorio, pa na un manera keto cai drumi canto di nan ariba cama, y cuminza caricianan, y tambe besanan te ora cu nan spierta for di sueño y mandando un grito di susto, e persona ta core bai, of tin biaha e ta amensasa nan cu horcamento si nan no keda keto.

Porfin e sex-maniak a ser deteni, na momento cu un di su victima a reconoce, y asina a avisa polis.

NA CAS UN BON TATA.

Tawata na cuminzamento di January, ora cu ariba un dia Michel Humery di 41 año di edad a bin biba



Michel Humer den tempo di su servicio militar na Algerije.

na Roibaix. Ningun hende a pone un atencion special ariba e homber aqui cu un curpa un poco gordo, y cu un cara no mucho agradable.

E la bandona Paris, na momento cu e dunador di trabou Brasserie Daumesnill a dune retiro como trahado.

E persona ey tawata un obrero cu semper a sabi di cumpli bon cu su trabou, aunque cu nunca e por a logra na ocupa un bon puesto na su trabou.

Michel Humery ta un persona masha activo pa brinda su ayudo na e bisiñanan of conocirnan cu mester di su ayudo. Door di esey e la bin na bira un persona masha popular. Tambe e ta un persona cu no ta gusta gasta placa. Nan sa comenta di dje, cu prome cu e gasta un cen, e tin cu bire tur dos banda.

Ariba 12 Augustus 1958 e la bin na casa cu Genevieve, un amiga di antes for di tempo di su juventud. E ta tata didos yiu, un mucha homber y un yiu muher. Michel Humery ta conoci como un bon tata pa su familia.

CHECKPOINT COLOR ta presenta

Oferta di Promer Santa Comunion 1977 na Color

- A. 4 portret diferente pose 9 cm — 13 cm
Fls. 12,50 na color.
- B. 12 portret 9 cm — 13 cm na color. Prijs especial Fls. 30,50
- C. 12 portret 9 cm — 13 cm na color Y 1 portret grandi 13cm — 18cm. Prijs especial Fls. 52,50
- D. 12 portret 9 cm — 13 cm na color Y 1 portret grandi 20 cm — 25 cm. Prijs especial Fls. 62,50



E BISHITANTE DI SEX.

Michel a bin mientras tanto su so na Roubaix, pa asina e prepara e casita cu ta un poco for di condicion, mientras tanto su esposa hunto cu su dos yiu a keda na Paris.

Michel a cuminza na duna e cas un bon verf. E manera activo cu e ta, y tambe su sistema cu e ta un persona masha cariñoso, a haci cu henter e habitan-
tenan di ey banda a bin haña cu e ta un persona masha simpatico.

E simannan ta pasa cu calma. Solamente na e warda di polis na Roubaix kehonan ta drentando sin fin. Un hende muher a duna e siguiente keho: "Tawata un anochi, cu soño di tempran a cuminza drenta mi. Esey ta bini cu e anochi prome mi no a drumi, door cu mi a sali henter anochi cu mi amiganan bishitando diferente night club. Como cu ora bo ta un poco molestia di mas, esey tambe por stroba bo di pega soño, pa mas sigur mi a tuma un pildo pa drumi, cu un buki di novela den mi man mi a bin pega soño. Mi ta calcula cu mi ta tin 45 minuut cu mi a pega soño, ora cu mi a sinti un hende ta caricia mi. Den mi mes ta manera soña mi ta soña. Mi ta soñando cu un mucha homber di diesocho aña mas o menos, cu mi a topa den un di e dancing nan. Mi ta soñando com e mucha homber ey ta cu mi den un park, y com e ta caricia mi y besando mi tur parti di mi curpa. Tawata e momento cu e mester a cuminza besa mi mas abou, mi no por a domina mi mes, mi tawata na e punto final y na e momento ey mi a cuminza sapatia, y asina mi a bin spierta. Mi tawata suf di soño ainda, mi wowo casi no por a habri, pero no a dura ni un seconde cu mi a cuminza grita cu tur mi forsa, e homber a purba di domina mi grito cu un beso ariba mi boca, pero ora cu e no a logra e la sali na careda for di mi kamber." Esaqui ta un di e declaracionnan duna na polis.

Ariba caya mes bo ta tende e siguiente comentario; un par di hende muher ta combersando cu otro:

"E dama ey a bai conta polis loque a pasa cu ne, pero e no a conta si, loque cu e la conta otro hende tambe, esey ta, cu e ta tin duele cu e la bin spierta for di su soño net na e momento cu e tawata den su cielo." Un machi bieuw, cu tawata siquiendo e combersacion di caya cu un smaak, a bin cai aden cu su combersacion: "pero ta ki sorto di muher esey ta, mi ta puntrando mi mes. Sigur lo e ta bisti cu un japon di drumi, sin nada abouw, i ken sabi, cu no ta un buki di sex e ta lesando envez di un buki di novela" Mientras cu e machi bieuw ta bizando esaqui, e ta hariendo cu asina un smaak, cu bo por conta su dientenan cu e tin den su boca. Mientras tanto polis nan a keda man na cabes, e caso ey nan no sabi com pa resolve. Tampoco e aumentacion di polis pa den oranan di anochi, no ta tin resultado. Mientras tanto Michel a bin logra na haña un trabou na un panaderia den e caya Lalane. Su hefenan ta contento y orgulloso na e manera cu e ta compliendo cu su trabou.

NAN A RECONOCE DEN E PANADERIA

Tawata ariba un diadomingo mainta cu na e momento ey e panaderia tawata yen di hende. Michel tambe tawata judando e mainta ey. E clientenan cu tur nan pasenshi ta sperando nan turno pa wordo sirbi, mientras cu nan ta combersando cu otro ariba tur loque cu a pasa. Entre e clientenan tin un mucha muher tambe cu ta wardando su turno, su wowo no por kita for di Michel. Diripiente e la cuminza grita: "Esey te homber! Esey mes te! Mi ta reconece! Esey te homber cu a drenta mi kamber mientras cu mi ta drumiendo, y a trata na hasi abuso cu mi!"

A cuminza reina un silencio den e panaderia. Tur hende ta dirigi un bista ariba Michel Humery. "Despensa mi señorita, bo ta equivoca, esaqui ta un di nos empleado." E propietario di e panaderia ta cai aden.

"Si, te mes, mi ta sigur di loque mi ta papiando.

Tawata scur den mi kamber,pero mi ta reconose si, ta e mes ta e persona!

No a dura mucho,cu polisnan a presenta,i den corto tempo Michel Humery a declara tur cos.E commissaris di polis a keda cu boca yen.Durante su aña nan di servicio como polis, e la pasa den un cantidad di cos,pero e homber cu un sistema asina keto,e no por mira den dje un homber cu ta penetra den e kamber di e hende muhernan,pa asina roba algo ariba tereno di sex.Pero e fingerprint nan cu e la laga atras,ta e prueba cu te mes ta e homber tan busca.

Robert Nahar Construction Company N.V.

Contractors

General Construction:	Steel, Concrete, etc.
Steel Construction:	Tankbuilders, Pipelines, Sheetmetal
General Cleaning:	Chemical-, Mechanical and Boilercleaning
Construction Equipment Rental:	Weldingmachines, Cranes, Generators, etc.
KIBAIMA (BALASHI) 65	Plumbing & Roofing

TEL: 1834

E habitantenan di Roubaix, porfin por ta tranquil atrobe. E sadista, e bon tata di familia cual anochi ta drenta e kambenan manera un sex-wolf ta arresta.

Dilanti di corte di Roubaix Michel a wordo sen-

tencia pa 4 año. Mientras tanto su dossieman a wordo manda na Paris, como cu ta ey nan e la biba.

Su señora, cu awor ta tratando pa divorcia di dje, ta bisa cu Michel ta un persona cu tin e caracter mas suave di mundo.



Foto: ANP

Un belleza cu sigur por calma y mansa e curazonnan di tur e personanan di e sexo masculino, sin duda lo ta e preciosa artista aqui, DANA GILLESPIE cual lo tin e rol importante den e pelicula nobo "The people that time forgot", cual pelicula ta bai tocante un mucha muher (Arjo) den e tempo di antes. (Stenen tijdperk). E pelicula aqui actualmente ta wordo filma pa London Pinewoodstudio.

E CANTICA DI PASADO

Cu un pipa na su boca un pachi bieuw ta lastrando su slofnan den su casita di palo. For di un radio chiquito, cu yen di rasca ariba dje, ta sali tononan musical.

"Ta ki sorto di musica esey ta awor, e pachi bieuw ta puntrando den su mes, mas nan grita, mas bunita e juventud ta haña esey. Tende, e pachi bieuw den su mes ta pensando, tende e quitara, ni un pushi mes no ta grita asina.

Ha Ha, e ta hariendo den su mes, despues cu e hard rock a termina. Anto, tende kiko Ruben Garcia ta bisando di e desordo ey via radio, un bunita cancion, figura bo, e pachi bieuw ta pensando den su mes, mientras cu e ta halando un huma for di e pipa, tapando e cas asina cu un cortina di huma. Ruben, ta yama e cancion ey bunita, pasobra e no a tende e cantica for di mi tempo ainda.

Esey ta un cantica, cu a encanta mi curazon, e tawata un cantica jen di melodia; For di mucha, mi a yega di tende e cantica ey, e pachi bieuw ta papiando den su mes, mientras cu e la cay sinta ariba un banki cu e mes a claba den otro, y geverf na un manera cu ainda bo por mira e marca nan di e ca-

beynan di e kwashi cu a keda den e verf color berde.

Despues di a rek su man na e konopi e la paga e radio, y cu un stem un poco heers e ta sigui papia den su mes: "Boso no ta toca nada toch pa nos bieuwnan, ta bo canticanan pa juventud so boso ta toca na radio." E pachi den su mes ta papiando mientras cu e ta consumi su mes.

"Lastima cu mi no sa canta, si mi tawata por a canta, sigur lo mi a canta e cantica bieuw ey na radio. E cantica for di e tempo bieuw ey, tawata un cantica bunita mes.

Mi mama e tempo ey tawata cante pa mi, na mi cama, prome cu mi bai drumi. Pero e tempo ey a pasa, y awor e ta pertenece na pasado, e pachi bieuw den su mes ta pensando, mientras cu su man drechi ta bai na su saco di carson, for di unda e ta saca un lenso, pa e seca e lagrimanan cu poco poco ta ocupando su wowonan, y secando e lagrimanan e ta sigui papia den su mes:

E canto tawata sali asina bunita y asina suave for di su boca, cu bo por keda oranan pa scucha mi mama canta. Mi mama semper tawata un bon mama

Grupo Teatral

Bou Direkshon di Burny Every
ta presenta

'ANTIGONA'

TRAGEDIA GRIEGO DI SOFOKLES

NA CAS DI CULTURA

Dia 27 - 28 - 29 di mei pa 8.30 di anochi

E tragedia "Antígona" ta trata situashonnan den kual hende ta haña nan den konflikto ku "law and order", kasonan di desobediencia sivil: kaminda un persona ta bai kontra lèi di gobièrno, sin uzo di violensia, pasobra é ta haña ku lèi òf lèinan èi ta bai kontra su konsenshi. Esèi ta e punto di bista di Antígona, kende ta persigí su desishon te na morto.

ENTRADA GENERAL Fls. 5,—

pa mi, e pachi bieuw poco poco ta bisando den su mes. Mi mama, semper a sabi di keda te den oranan di marduga cu mi, zoyando mi ora cu mi no por pega soño. Mi mester ta un baby masha molestioso mes, segun mi mama, e homber bieuw den su mes ta pensando, mientras cu e ta knik cu su cabes na e momento cu e ta bisa lo siguiente: "Si, mi mester a molestia mi mama masha hopi mes, pa e keda tene mi den su scoothi te den oranan di mainta, mientras cu e ta canta e cantica cu te awe mi ta recorde. E cantica ey si a jega di resona den nos hogar, hopi mes, e la wordo canta pa mi mama.

"Mama . . . bo ta hopi leeuw for di mi . . . pero mi curazon no por lubida bo nunca. Caramba mira te na unda mi pensamiento ta hiba mi, e pachi bieuw realizando te na unda e ta pensando ta bisando su mes, mientras cu e ta pone e pipa cu ya a paga ariba e mesa dilanti e radio, pa despues e bai leeuw den su pensamiento atrobe: Ainda mi por recorda, e mucha muher cu su cabei preto, cu ta colga te ariba su schouder, e tambe tawata sabi e cantica ey, e pachi bieuw pasando man na su frenta ta bisando. E mucha muher e tempo ey a roba mi curazon, ta manera ta ayera esey a pasa, e pachi bieuw den su mes ta pensando, si, ta manera ta ayera mi a mire ta acerca mi den e cunuco, jena cu maishi berde y bunita, ainda mi por corda com e la hari cu mi, na e momento cu mi a regale un patia, figura bo, ainda mi por imagina mi e holor cu e cunuco tawata produciendo, mientras cu e tawata brinda mi su sonrisa, si anto e solo for di halto, tawata e unico testigo na e momento cu e la brinda mi un wowo di cariño. Esey mi por bisa ta nifica juventud, e pachi bieuw cu un sonrisa ariba su cara ta papiando den su mes, esey ta nifica amor!

Lastima cu e tempo ey a pasa mas liher cu mi por a spera, e ta pensando den su mes, compañia pa un tosamento. Caramba, e ta sigui ta pensa: E cantica ey, mi por corda, cu ta nos tur tawata cante na cas. E tawata un cantica cu ta penetra den bo curazon.

ESTRELLA SUPERMARKET

*Ta superior den servicio
Cu su calidad den comestible nan.
Tambe tanto fruta, i verdura
i beleg pa pan.
Haci bo compras cu tranquilidad
den ambiente di nos
airecondicionado.
Den cual un cantidad di hende a
deposita nan confianza i awe nan
tur ta nos cliente.
Gracia na e tanto cliente cu nos
tini.
Nos por brinda bo, producto di
alta calidad.*

STA. CRUZ 250


TEL: 8420

Pero e tempo ey a pasa masha tempo caba!

Awor no tin ningun hende ta canta e cantica ey pa mi mas, no, e pachi bieuw ta pensando, awor aqui bo no ta encontra ningun hende mas cu e bondad ey, pa canta e cantica ey, pa un homber bieuw manera mi. E mundo aqui pa mi ta algo tristo mes, no tin ningun muher mas na e mundo aqui, pa seca e lagrimanan cu mi no por evita mas, cu un sunchi.

E cantica tampoco, no tin ningun hende mas, cu por cante pa mi tende. Pero kiko mi mester haci mas, si e unico cu por a cante pa mi, ta den cielo. Awor mi ta un homber bieuw, e ta papiando cu un voz tristo den su mes, si. . . mi ta un homber bieuw solito den e mundo aqui". Diripiente su atencion a wordo kita, for di pafor e ta tendiendo un canto cu un stem heers ta resona, sacando un canto for di su boca na un manera falso. Pero, esey no ta importa, e ta cantando e cantica di pasado, e cantica cu su mama semper a canta pe. Cu un sonrisa ariba su cara e pachi bieuw, a bai para den e porta pa asina

e por skucha e cantica mas mihor. Tawata un muher ya di edad tawata pasando cu un garoti den su man bouw cantamento. Despues cu e muher bieuw poco poco a somenta for di su bista. E pachi bieuw a bolbe bai na unda cu e la laga su pipa. Pegando e pipa e ta bisando, danki Señor cu bo a manda un hende pa canta e cantica pa mi, mientras cu e ta halando un huma for di su pipa.



EL

GAUCHO

BAR RESTAURANT "EL GAUCHO"
SPECIALIDADES DEN

1 PARILLA: ARGENTINO
2 CHURASCO
3 PINCHO

SEAFOOD
1 SCAMPI — JUMBO
2 KALCO Y MUCHO MAS

SERVICIO UNICO.

Wilhelminastraat 80

Oranjestad

PROME ELECCION DI COMITA NA CLUB BO-
NERIANO TAWATA UN EXITO COMPLETO.

Cu un zonido cu ta bini manera di un otro planeta,
The African Blood a duna e señal cu e diasabra
anochi di 23 April ta asina leeuw.

“Con ta bai bon?” Ruben Garcia (scorpio) ta salu-
dando e publico, bon, bon, e publico ta contestan-
do Ruben Garcia. Para na su banda robes ariba e
podium, e animadora Freda Maduro tambe na su
manera a saluda e publico, sigui pa un fuerte aplau-
so.

Asina nos por bisa cu e eligimento di tres candida-
tanan pa e districto di San Nicolas, cu lo bai com-
peti pa e corona di Miss Teenage Aruba tawata den
full swing, mientras cu e candidatanan un pa un na
nan manera ta presenta nan mes na e publico.
E fansnan cu gritonan ta purba di convence e
miembronan di jurado, pa asina nan candidata por
logra un cifra mas halto cu ta posibel.

“Ria. . . Ria. . . grita awor no! un di e juradonan ta
waak pa atras, grita pa e tende uno ta gritando.
Pero nan grito pronto a wordo domina, of dirti ma-
nera ijs den solo na momento cu Srta. Vivian Arrin-
dell a presenta, e candidata mas fuerte den aplauso
pa e anochi ey.

Despues nos tawata di e leeuw ey, dos persona a
compaña e juradonan pa un kamer priva, camin-
da e puntonan lo ser conta.

E mes un anochi aqui tambe ta tin presentacion di
e candidatanan pa e otro districtonan, cu un aplau-
so fuerte pa parti di e publico nan ta wordo saluda,
mientras cu algun di e presentenan na un manera
no adapta na e anochi ey tawata gritando boe.
“Laf no, Miss Teenage Aruba 1976, Srta. Carla Wix
cu ta sinta na mi banda robes ta comentando, diri-
giendo su mes cu su miradanan den e publico.
Tawata mas o menos 10or di anochi ora cu e miem-
bronan di juradonan a bolbe na nan mesa.



Ruben Garcia, un poco stijf e anochi ey ta subien-
do e trapi pa e bai ariba e podium, (un dia prome,
Boulevard a encontra Ruben coriendo y haciendo
ejercicios ariba e carretera di Boulevard), mientras
cu e animadora Freda Maduro tambe a ocupa su
lugar dilanti e microfoon, pa asina nan yama e can-
didata nan un pa un atrobe ariba e podium.

Bunita un y tur ta luciendo ariba e podium cu su
color preto, dorna cu flornan artificial di color
corra y geel.

Emocionante tawata e final di anochi na momen-
to cu e tres finalistanan a wordo menciona. E
feliz finalistanan pa e districto San Nicolas cu lo
bai competi pa e corona di Miss Teenage Aruba
1977 na Americana Hotel 25 Juni 1977 ta; Srta.
Deborah Felix , Morellys Maduro, y Vivian Arrin-
dell. Despues di e eligimento di e tres candida-
nan a sigui un fiesta bailable cual tawata den man
di La Re- Encarnacion y The African Blood te den
ora nan di marduga.

XXXXXXXXXXXXXXXXXXXXXXXXXXXXXXXXXXXXX
**LINDA
SELF
SERVICE**



E supermercado caminda e prijs nan ta unico aqui na Aruba.
Cu poco placa,bo por haci compra na grandi.
LINDA SELF SERVICE , bo lugar preferido,su propietario ta
e conocido Niki de Kort.

Bernhardstraat 2B

Tel. 5314

S.N.Aruba

XXXXXXXXXXXXXXXXXXXXXXXXXXXXXXXXXXXXX

Un diadomingo sin gracia

Cu un cara ainda di soño Jackie ta lantando for di su cama. Pa un momento su pensamiento ta hibe na Palmbeach, na unda hunto cu su klas e lo bai pasa un buitendag e diadomingo ey.

Den su imaginacion ya e ta sinti e holor di e lamar cu su awa salo, y e biento suplando door di e palmanan di e mata di coconan.

Su amigo tambe lo pasa pa un rato ey nan cu su brommer. "Mi tin algo urgente pa bisa bo mayan."

Su amigo Coisy a bise. Loque cu e kier a conte, e no kier a hacié e momento ey, como ta tin mas hende presente.

Kiko lo e tin di bisa mi, Jackie ansioso pa sabi ta puntrando su mes.

Aunque cu e ta un diadomingo manera tur diadomingo, Jackie no ta sinti su mes na su gemak, e ta sinti su mes na un manera straña. Dirigiendo su mes na su ruman muher di mas edad cu ne, e ta conte, cu e no ta sinti su mes na su gemak. Na cual su ruman muher ta conteste: "Mi ta kere cu algo lo bai pasa."

E kalender e diadomingo ey ta marcando 6 Maart 1977.

Contento, haciendo pret, hunto cu su klas e ta na e buitendag e diadomingo ey. E solo for di halto ta mandando su rayonan ariba e lamar, haciendo asina e lamar blauw luci mas y mas. Suave e biento ta suplando, formando un canto door di e palmanan di coco.

"Ta kiko ta pasando cu ainda Coisy no a bini?" Jackie ta puntrando den su mes, mientras cu un desordo di un brommer a existi su atencion. Coisy a bini, Jackie ta pensando den su mes, awor si lo mi bin na sabi, ta kiko e tin di conta mi. Pero su contento tawata por nada, no tawata Coisy, tawa-

ta un otro mucha homber ariba un brommer. E dia a pasa masha poco poco. Jackie no por bin na sinti su mes tranquil. Continuamente e palabra di su ruman muher ta resonando den su horea. "Mi ta kere cu algo lo bai pasa." Ta di comé palabra aqui no kier kita for di mi mente? Jackie ta puntrando su mes. Pero no tin ningun hende cu por conteste esey.

Tawata mas o menos 2or di atardi, ora cu un amiga di Jackie a jega na e beach, y a cuminsa na conta Jackie cu a pasa un accidente serio, entre un brommer y un auto banda di Tarabana. E palabranan ey no a preocupa Jackie mucho. "Ken sabi, cu Coisy no a bai cu su brommer pa mira e accidente! E ta pensando den su mes.



Foto: Checkpoint Color

Discorama y su 30 Exitonan via Voz di Aruba pa e animador Victor Pieters



1. Juguete caro — Punto Sur
2. Se deja de querer — Ricardo Acosta
3. No volvere — Rudy Hernandez
4. Hoy te toca dormir en el suelo — Yolanda del Rio
5. De esta agua no voy a beber — Roberto Livi
6. Volveras — Aquamarina
7. Tu eres la mujer — Raul Michel
8. Recibi pabien (wals) — Boysie Croes
9. Vamos a reir un poco — Hector Lavoe
10. Maria Caracoles — Carlos Santana
11. Durmiendo en la misma cama — Mando Salvan
12. Por que te quiero — Nancy Ramos
13. Tristeza Marina — Grupo Chicless
14. Policia Policia — Cortijo y su combo
15. Derrumbes — Nohemy

16. Ya no vuelvo a molestarte — Juan Gabriel
17. Lamento borincana — Libre
18. Mi desengaño — Roberto Roena
19. Mujer que sueñas — Santiago
20. Delirio — Los Angeles Negros
21. Se que tu — Celia, Johnny, Justo, Papo
22. Quiereme mucho — Albert Hammond
23. Neishie Maribomba — Tito Flores
24. Engañada — Danny Rivera
25. Los Ves — Nohemy
26. La Leyenda — Tito Puente
27. Jacobo Basura — Bobby Valentine
28. Tu — Leo Dan
29. Ansiedad — Albert Hammond
30. La Media Vuelta — Sophy



ODUBER KAN

NASSAUSTRAAT 42-44

OPTICA
ZEISS
UMBRAMATIC

Christian Dior
Ray-Ban

CAMARAS:
KONICA - YASHICA
LEITZ etc.

Tawata banda di 2.30 di atardi, ora cu na e momento ey Jackie ta biniendo di Arowak, cu ice-cream den su man cu e la caba di cumpra pa su mes y pa su amiganan. Contento e ta lastrando su pianan den e santo blanco, e no ta sinti mes cu e santo ta cayente di e solo, su pensamiento ta ariba Coisy cu ainda no a bini. Despues di a para un momento pa mira tur dos banda cu no ta bin auto, e la dici-di di crusa caminda. Diripiente di un distancia e ta mirando e auto di su mama, parkeer na e beach. "Ta auto di mi mama esey ta, Jackie ta pensando duro den su mes, sigur mi mama a trece mi dos rumanan mas chiquito na lamar. Bayendo na e auto, su wowonan a bin encontra cu su ruman muher. Cu un sonrisa ariba su cara Jackie a camna jega serca, pero su sonrisa a dura poco, na e momento cu e la ripara cu e wowonan di su ruman muher ta corra y ta coriendo lagrima. Spanta y un poco nervioso e la laga su bista cai ariba su mama . . . su wowo tambe ta riparabel cu e la yora. "Ta kiko apasa?"

"Coisy no tey mas, lo mi no tende su harimento mas, lo mi no tende su stem mas, Jackie bayendo pa su cas ta pensando, e mundo aqui ta cruel, awe e por brinda bo alegria y mayan tristeza. Jackie tristo ta pensando den su mes, mientras cu ainda e no por a kere cu ta berdad esey a bin na pasa. Keto, y silencioso e ta drumi den su caha. Tawata parce cu ta drumi e ta, y cu pronto lo e despierta for di su soño. Un cantidad di amigo ta presente pa ultimo biaha serca Coisy. Tambe Jackie ta para pa ultimo vez canto di Coisy. Keto Coisy ta drumiendo. . . loque cu e kier conte e no por hacié mas. Coisy su alma ya ta den cielo. Jackie den su mes ta pensando, pa despues poco poco e bisa den su mes "Coisy. . . sosega na pas . . . hamas, nos ta lubida bo, den mi memoria, y tambe den memoria di bo familia, amigonan y conocirnan semper lo bo keda graba." Cu e angelnan na cielo cu nan canto y musica di harpa lo por yama bo un bon bini den bo hogar nobo.

LA PRINCESA

La Princesa e muebleria cu servicio halto, pero cu prijs nan sumamente abouw, ta anuncia cu e tin tur loque un cas mester pa brinda bo.

MUEBLES - TAPIJT - CORTINA

Haci nos un bishita i convence bo mes.
Loque bo no mira, puntra pe.

LA PRINCESA

San Nicolas

Tel. 5541 - 5368

GOLDEN

GROWN

E unico Leechi cu corona di oro. Cu un sabor delicioso, i rico na vitamina.

Obtenible na tur tienda y Supermarket recomienda.

Agente:

H.S. CROES SUPERMARKET

Tel: 8068


NA TUR E MAMA NAN

*Awe cu ta dia di Mama
Nos tur ta jena cu alegria
Pa esnan cu tin nan mama na bida
Lo pasa masha feliz ariba su dia*

*Pero ki tristeza lo ta pa esnan
Cu ja nan mama a bai laga nan
Kende nan no por tin e balor
Di por sinti un mama su calor*

*Pesey esun cu tin su mama
Stime y gradicië
Nos mama ta un similla
Perdé no por hajé*

*No haci nada cu no ta bon
Pa no molestia su curason
Nos mester pidi na nos bon Dios
Pa otro anja e ta na bida cu nos.*



MEP



**E unico
garantia pa e
realizacion di nos
independencia**

Seis rosa pa un amor sin valor

E anochi cu Mary Cecilia Boxall a encontra pa prome vez cu James Newton, e ta tin un deseo fuerte pa un homber.

Mary tin 43 aña di edad y James apenas tin 18 aña. Aunque cu James ta un poco jong, toch e ta parece uno di mas edad, e ta parece mas bieuw di loque e ta.

Mary Boxall kende ta biba na Greenbankstreet Dartford (Kent) a encontra cu James pa prome vez na e momento cu James mester a entrega un caha di comestible na su cas. James nunca antes conoce e muher ey, y e no sabi cu e muher ey tin 25 aña casa caba, y tampoco cu e ta mama di un yiu muher grandi caba di 20 aña. I tampoco e tawata sabi cu su esposo kende tin 48 aña di edad, ta na e momento ey malo den hospital.

Tampoco James tawata na altura cu e muher ey ta tin varios amante caba den su bida. I cu e muher ey ta anhela pa un homber pa e siguiente anochi, como cu e muher ey sabi cu su esposo por lo pronto no sali for di hospital toch. . .

“Pasa un rato paden, e la bisa cu un stem cariñoso dirigi na James. Nos por bebe un koppi koffie of un cerves.”

Na e momento ey James a ripara cu e tin un japon masha fini bisti, y cu bo por mira asina tur su figura.

E la dreña paden, y despues di a mira rond unda pa sinta e la dicidi di cai sinta ariba e sofa. Mary, aunque di 43 aña di edad, pero kende ta parece hopi jong mes, a bin algun paso mas serca dje, y despues di a para un rato, tambe a cai sinta ariba e sofa caminda cu James tambe ta sinta. Despues cu un sonrisa a puntra lo siguiente:

“Ta kiko bo ta spera mas?” I cu e palabra ey tambe e la coi e man di James tene, pa despues pone e man di James ariba su pecho.

E mucha homber kende nunca antes no ta tin contacto cu ningun mucha muher, a cuminza bira verlegen.

“Caricia henter mi curpa, Mary cu un voz abouw manera un kehamento ta bise jen di deseo. Ora cu Mary a ripara cu su deseo no ta ser cumpli, e la lanta for di e sofa, y cu su man teni cu di James e la sali for di e sala caminda e la subi e trapi hunto cu James pa asina nan a dreña e kamber. I



KOOLMAN'S FLOWERSHOP

DEMONSTRA BO APRECIO y
CARIÑO CU FLORNAN DI

KOOLMAN'S FLOWERSHOP

SERVICIO 24 ORA PA DIA.

Boerhavenstraat 30 Tel. 3161
Oranjestad Aruba.

despues di un beso largo cu e la duna James, e la cuminza ta caricia e mucha homber, mientras tanto cu e la desnuda e mucha homber pa despues e desnuda su mes tambe. Bouw di caricia nan a cai ariba e cama, na unda Mary mes iniciativo a tuma e anochi ey pa indica e mucha homber tur loque e la falta ariba tereno di sex.

E ESPOSO TA CUMINZA NA SOSPECHA.

Dianan despues ainda James ta recordando e anochi cu e la pasa den compania di Mary. Aunque com cu e la trata, e no por a bin na logra di saca e imagen di Mary for di su pensamiento, aunque cu e muher tin un edad cu e por ta su mama.

Tur esaqui a pasa na aña 1971 un poco prome cu pasco di nacimiento. Despues pa dos aña sigui, e ta un amante fiel di Mary Boxall, kende no ta preocupa cu por ta un trahador di caminda of ta un verfo ta su amante. Basta cu su deseo wordo cumpli, ariba e tereno cu e ta desea.

Mientras tanto e esposo di Mary, kende a regresa cas for di hospital, a cuminza ta sospecha algo, na e manera straña cu su señora ta haciendo.

Casa de Granito Aruba

Ta ofrece 20 % descuento ariba mosaicos di tur color i tamaño. Mosaicos di Granito tamaño grandi i chiquito na un prijs sumamente barata. Nos mes ta schuur i wax nan pa bo na e prijs di FLS. 16.50 Tambe nos ta schuur otro mosaico pa unicamente FLS. 3,50. Un precioso fontein pa solamente FLS. 160,—

Jama pa mas informacion:

Nassastraat 242
Sero Lopez 2

Tel: 4448
Tel: 8748

Ariba un anochi cu e la bai pa traha warda, e la di-
cidi di keda na un distancia di su cas scondi den su
auto. Mucho e no mester a keda spera, ora cu e la
mira James Newton a presenta. E esposo kende ta
ser engaña, no ta tin pasenshi pa spera pa asina e
por a encontranan ariba cama, pero e la encontra-
nan ariba e sofa den brasa di otro, ta besando otro.
Despues di un pleitamento e la core James for di su
cas, y e la consehe pa e no bin su cas mas. Pero e
mucha homber kende ta loco enamora di Mary, a
cuminza ta amenaza e esposo di Mary, cu e lo ma-
te si e mester purba mishi cu ne, of si e mester pur-
ba na haci algo cu Mary.

Sr. Boxall a manda un caso dilanti contra James,
na unda corte a prohibi pa James no drenta e cas di
familia Boxall mas. Pero James Newton no por bi-
ba mas sin su prome amor.

Tawata na November 1973, ora cu James bouw di
fluitmento tawata na caminda pa e cas di Mary.
Contento e tawata na momento cu e la pusha e
porta habri pa asina e drenta paden, pero e la keda
paralisa na momento cu e la ripara cu Mary no ta
su so, pero e tawata den brasa di un otro persona, y
nan ta leeuw for di e mundo, besando otro. Des-
pues di un momento James a bin na conoce e per-
sona cu ta cu esun cu tanto e ta stima, Ta Barry
Dixon, e partidior di leechi. Mas despues e la bin
atras tambe cu un negociante den cosmetica, tam-
be sa bishita Mary diferente vez.

Tanto e partidior di leechi y e negociante a ame-
naza James cu morto. Pero Mary na su manera a
calmanan. Den un combersacion cu Mary ta tin
cu James, e la bise lo siguiente:

“James, dispensa mi . . . cu mi tin cu laga bo sa esa-
qui: pa mi bo ta un persona mucho joven, bo ta
jong ainda. I loque mi mesterta hombernan
cu experencia den amor. Mi kier hombernan ber-
dadero bon den cama, y no mucha homber jong cu
cu no tin e practica, den loque mi kier. James no
a tuma e palabranan ey na serio.



Mary Boxall, pa esnan cu conose ta bisa cu e ta un muher sin
moral. Un anochi cu e ta den un necesidad, e la bin logra su de-
seo via un mucha homber joven, cu e la pone den tentacion.

PANAMA STORE

Variacion grandi den bistir pa
damas, caballeros, y mucha.
Tur clasa di telas - tanto den
katoena como seda.
Maleta — Sapato — Cama.
Paña pa cortina.
Tur na un prijs combiniente.

BO SHOPPING CENTER TA
(ADOLPH GRODER'S)

PANAMA STORE

San Nicolas.

Tel. 5131



Pa un bon
Fotoreportage
Di Matrimonio
Recepcion

Potret di bo baby y
bo yiunan tanto den
color of preto cu
blancu

BO FOTOGRAFO
TA
JANY MADURO

TEL: 8661

BO COURANT DI SEMPER
PA MIHOR
INFORMACION, NOTICIA, I DEPORTE
JAMA 4333 Y ABONA BO MES
NO LUBIDA BO COURANT TA

Amigoe di Aruba

DISTINGUI BO MES

HUMANDO

Marlboro



SUPERIOR TOBACCO N.V. O'Stad . Aruba.



James Newton, nunca antes ta tin contacto cu un mucha muher, of cu un muher. Te ariba e dia cu e la sera conosi cu Mary Boxall.

Tawata ariba un diabierna 11 January 1974, e esposo di Mary a caba di sali for di su cas pa e bai trabou, na e momento cu James Newton a camna dreठा e cas cu un bouquet di rosa den su man. Mary ta parce, cu e ta den pura pa bai un caminda, y e la nenga di bai cama cu James, ora cu esaki a puntre pa esey. Atrobe Mary a ripiti di loque cu e la splica James caba, tocante cu James ta mucho joven, y sin e experiencia necesario ainda, pa brinde loque cu e ta desea. Diripiente e bel di porta a ring. Tawata Barry Dixon, e partidior di leechi, kende tin un compromiso cu Mary na e momento ey. E la laga sabi, cu e lo bai, pero e lo bolbe den mei ora bek. Na cual e la cumpli cu esey tambe. "Mi no mester di un mucha, pero mi mester hende homber cu experiencia, Mary cu un voz sara, y cu palabranan corto ta lage sabi, abo ta un mucha completo. Entre nos dos, tur cos a jega na un final. Mira pa bo aleha for di mi bista." Mary ta bise, y na unda e ta munstra cu su dede na e porta. Si. . . aleha for di mi bista."

James a cai na rodilla, y a cuminza roga na Mary, pa no core for di dje, pero pa Mary keda tene como su amante: "Lo bo mag tin relacion cu e partidior di leechi, y tambe cu e negociante, of cu kende cu bo ta haña cu ta bon, pero no core mi for di bo. No. no, no haci esey cu mi." James ta rogando na ne manera un mucha chiquito.

Pero, ora cu Mary a sigui nenga, James no por a domina su mes, y diripiente e la gare tene na su garganta, y mientras tanto cu Mary ta gritando cu loque cu e tin pa ayudo, James ta sigui ta preta su man na e garganta. E la sigui te na e momento cu su cabes a keda colga sin bida. Despues tambe James a manera perde, e no sabi kiko pa haci, e la purba na scape trobe via mond aan mond ademhaling, pero sin resultado. Na e momento, cu e la mira cu e no tin bida mas, e la huý for di e cas.

I manera a ser palabra, e partidior di leechi Dixon a bolbe un mei ora despues, na cas di Mary. Despues di a bel varios vez, y ora cu e porta no a ser a habri, e la dicidi di yama polis, na unda nan a bin haña e muher sin bida.

No mucho leeuw for di London, polisnan a detene James. Na e polisnan e la declara lo siguiente: "Mi no tawata sa delanta, cu e dia ey mi a cumpra e ultimo bouquet di rosa pa Mary, y tampoco cu e ta destina pa e morto cu tanto mi ta stima.

James Newton a haña cinco aña di prison sera. Na e momento cu e polisnan tawata camna cu ne, pa hibe na e auto cu lo tin cu hibe pa e prison, James cu un voz hopi abouw a bisa: "Danki . . . danki, mi gran amor. . . .

RUBY'S



BOUTIQUE



Almacen Juvenil Unisex

*Pa blusas, shimis elegante,
Slacksets, short den tur
color, coverall di Jeans,
sapato elegante y
moderno*

RUBY'S BOUTIQUE

den Mainstreet

San Nicolas - Tel. 6904

No ta damas solamente por haci strip-tease

Pakiko ta hende muher so mester haci semper strip-tease, tawata e pensamiento di un dama cu ta pensando na organisa un party. Pero e no a keda cu e pensamiento ey, pero e la dicidi di contrata un hachido di strip - tease di e sexo masculino for di Birmingham.

Un dama, ex model, Jane Gold, kende ta casa cu e propietario di e discoteca The Tramps, ta na estado. E ta sperando un baby. Jane Gold ta asina contento cu pronto e lo bai ser mama, cu e la dicidi pa celebra esey.

Pero e unico problema cu e dama tin, ta cu e no kier celebre solamente cu champagne, bolo, refresco of cerves. E kier brinda su amiganan algo otro, algo extra.

Porfin, Jane hunto cu su esposo John a bin cu un idea sublime: "Pakiko mi no por invita un bailador di strip - tease di clase masculino?" Jane cu un stem cariñoso ta puntrando John. Pakiko no, John ta contestando su señora. I asina nan a dicidi di manda busca uno for di Birmingham.


Laga nos menciona kendenan tawata presente na e party: E artista Carroll Baker, Françoise Pascal, e escritora Jackie Collins, e belleza cantante Julie Felix, fotomodel Mynah Bird, e bailarina Joyce Blair y e ex - Miss Australië Valli Kemp.



Ariba e potret aqui, nos por mira cu e stripper mes ta tin bastante pret cu su show.

**ACCENTUA BO
BELLEZA
USANDO
PRODUCTOS**

Revlon



DISTRIBUIDOR

ARUBA TRADING COMPANY



E stripper dilanti e invitadanan. Na e harimento di e damanan presente nos por realiza cu e show a cai na nan agrado.

Tur esakinan ta damanan conocir den e comunidad na London.

Na momento cu e damanan a drenta e sala di Jane Gold, e homber tawata sinta cu tur su tranquilidad ariba e sofa. Despues cu e damanan a proost cu e champagne, e homber a lanta para y a cuminsa cu su actuacion. Na un manera verlegen nan tawata hari e homber su show, pero nan a cuminza spanta ora cu e homber a cuminza actua na un manera cu nan no a spera.

Pero, ora cu e homber bailando, a cuminza invita e damanan pa desnude di su pañanan, di tur banda e damanan a cumpli cu e deseo di e stripper. Un a cuminza cu kitamento di su meya, un otro dama a kita e dashi y e (camisa) di e homber, mientras cu na final e mes a corona e show kitando tur su pañanan completamente for di su curpa, na unda ultimo ela keda solamente cu un pida paña mara mas abouw.

Pero e party no a jega ey nan na su final, un poco despues e homber a bolbe bisti su paña atrobe, y hunto cu e damanan nan a bai come na e restaurant Rags, un restaurant situa na Mayfair. Despues di a bandona e restaurant, e homber hunto cu e damanan a sali den un bus gehuur pa nan a bai na cas di un di e damanan, caminda nan a keda fiesta y haciendo pret te den oranan di marduga.

E bailador di strip - tease, como e la wordo paga solamente pa duna show di strip - tease, a dicidi di keda bisti cu su flus elegantemente te na final.


ARUBA TRANSPORT N.V.

Pa tur Transportacion pisa y
hauling containers.....

Tambe pa huurmento di
tractorsforklifters.....y
trucks

Kerkstraat 13 Tel: 3811

Home: Tel: 8234



Pa un bon y bonita regalo, bishita:

JOYERIA

OLGA



VASQUEZ

Tel: 2023

Nassastraat 66

Aruba.

HUMOR PA PROTEHA BO SALUD CU "LOS WOIS WOIS"



Mi ta kere cu bo ta equivoca, lo ta un otro Rosa Perez, pasobra ami te ainda ta soltera.



Mi mester pone un sonrisa ariba mi cara awor, mama?



Pero Fredy, cuanto biaha mi no ta bisa bo pa bo no discuti tocante politico cu e clientenan.

Conoce bo derecho


Un sospechoso of acusado, sea cu e ta deteni of no, tin derecho pa escohe un of mas consehero juridico pa defende su caso of e por escohe su representante legitimo (su tata, su mama, su curator of su voogd).

(H. Th. Lopez).

Muebleria TU HOGAR

Cumprando na MUEBLERIA TU HOGAR bo tin oportunidad di gana un amueblacion completo pa bo cas na fin di anja.

Cada luna tin un premio especial pa tur cliente di MUEBLERIA TU HOGAR.



Fergusonstraat 22 Dakota

Tel: 1371



**TIP TOP
AGENCIES**

GENERAL COMMISSION AGENTS

Tel. 2269 - Emanstraat 30

**Pa un koppi
koffie delicioso
usa semper**

**CREMORA
BORDEN**

**OBTENIBLE
NA
TUR
TIENDA
Y
DELICATESSEN**



**AGENTE:
MERCURIUS
TRADING
COMPANY**

Fergusonstraat 116

Tel: 1470 - 2345